

蜀

水

經

蜀水經卷之十六

京山李 元太初

邛水

邛水有三源北源出圓覺山西源出牛心山南源出伏牛山合流而東

邛水亦名濮千水亦名布濮水亦名栢木水漢書曰臨邛縣濮千水東至武陽入江過郡二行五百一十里又曰嚴道邛來山邛水所出東入青衣水經注曰布濮水出徼外沈黎郡從臨邛縣西布濮來分爲二

流一水經其道又東逕臨邛縣入文井江

邛水東北經火井縣故城南

華陽國志曰布濮水從布濮來合火井江有火井夜
時光映上昭民欲出其光先以家火投之須臾隆隆
如雷聲焰出通耀數十里以竹筒盛其光藏之可拽
行終日不滅井有二水取井火煮之一斛水得五斗
鹽家火煮之得無幾也博物記曰火井深二三丈在
縣南百里以竹木投取火後人以火燭投井中火卽
滅絕不復然名勝記曰臨邛火井諸葛亮往觀之火

轉盛蜀都賦謂火井沈熒於幽泉是也袁天罡爲火井令殘碑尙存或斷其龜趺作盆盎者立斃焉蘓東坡蜀鹽說曰陵州井最古清井富順監亦久矣惟邛州蒲江縣井宋祥符中民王鸞所開○故城西有銅鼓山才女黃崇嘏之墓在焉崇嘏俗稱女狀元者五國故事云州使君之女父母俱亡與老姥偕居未字人蜀王衍時相周庠在邛南幕中畱司府事時崇嘏以失火下臨邛縣獄因貢詩於庠庠召見稱鄉貢進士年二十餘祇對詳敏庠釋之召於學院讀書善琴

棋書畫薦攝府司尹參軍案牘麗明胥吏畏之庠欲
妻以女崇嘏獻詩庠乃知非男子也因乞罷歸舊隱
不知所終

邛水東受耬水耬水源出鳳凰山之虎擘泉流經耬壩
爲耬水東受鳳溪鳳溪源出橫山爲大飛水小飛水合
流東入邛

鳳凰山有紫栢十圍根蟠巨石之上號騎鯨栢有藥
師巖巖下有虎擘泉宋文與可記云鬱如雲烟湧如
波濤晴光陰嵐明昧一矚其間孤峯峩然傑立豪峙

首領巖嶽腹背聳峯翼開長巒尾掉高岡繁林茂樹
綠蔭纈采園擁森合梓若毛羽蓋前人以狀而名之
爾

大邑縣故臨邛依政唐興三縣地也唐武德三年置
安仁縣貞觀十七年廢咸亨元年復置二年分置大
邑縣元併安仁入大邑屬邛州○縣南三十里有安
仁故城陸游安仁道中詩曰天大圍平野江回隔近
村

邛水又東經邛州城南

邛州故臨邛縣也秦置屬蜀郡張若城其城周六里
漢王莽天鳳中公孫述爲導江卒正居臨邛二年徙
成都晉以縣屬晉原郡後爲獠人侵據不置郡縣豪
家自爲保主後魏廢帝三年定蜀置臨邛郡臨邛縣
又置依政縣屬蒲陽郡周分置火井鎮隋開皇廢郡
爲邛州大業復初移治嚴道十二年改火井鎮爲縣
唐武德元年復置邛州治依政縣顯慶三年移州治
臨邛縣天寶改臨邛郡乾元復爲邛州屬劍南道寶
應元年置鎮南軍大歷三年置防禦使改節度使咸

通八年改定邊軍文德元年改永平軍宋爲邛州臨
邛郡元至元十四年立安撫司二十一年省臨邛依
政蒲江三縣入州屬嘉定路明洪武九年改邛縣成
化十九年改州直隸上川南道今隸建昌道○州東
七十里依政故城西南八十里火井故城○城西南
白鶴山亦名四明山亦名羣羊山山北孤石聳立百
丈常有白鶴巢其上漢胡安先生講易司馬相如從
之遊今有點易洞宋魏了翁築室於此理宗御書鶴
山書院賜之陸游遊西巖翠屏閣詩曰把酒孤亭半

日畱西巖獨擅鶴山秋○古城山名五面山石鑛大
如蒜子冶流爲鐵甚剛漢初置鐵官文帝除鑄錢令
因賜上大夫鄧通蜀道銅山得自鑄錢通假民卓王
孫歲取千疋故王孫貨累巨萬億鄧通錢亦布天下
王孫有女文君能鼓琴司馬長卿客臨邛與縣令王
吉遊王孫家相如以琴心挑之文君因奔長卿今城
內有文君井南門外有卓王孫故宅墓方十里耕者
往往得銅錢明初掘得卓氏錢甕大可容五石色如
漆弁口宏腹足有籀文中貯五銖錢州人建亭藏之

謂之甕亭

邛水又東北受蒲江蒲江源出總崗山小海子北受乾水溝爲合水沱又北受羸坡水又東受平坦溪又東受龍鳳溪又東受巴蕉溪又東經蒲江縣城南又東北經壽安鎮受鐵溪鐵溪源出蓮花山東北經百丈縣故城爲百丈水又東經臨溪縣故城南又東入蒲蒲江又東北經迴龍鎮入邛

蒲江縣故蒲陽縣地也秦置屬蜀郡漢省入臨邛西魏分置蒲陽郡廣定臨溪二縣隋開皇廢郡以縣屬

邛州仁壽改廣定爲蒲江唐太和四年以蒲江屬嵩
州尋復故宋熙寧五年省臨溪爲鎮入州元至元十
二年省蒲江入州明洪武十三年復置蒲江以臨溪
鎮入之屬邛州○今縣北五十里有臨溪鎮臨鐵溪
也三面拒險唯北徑爲平耳宋魏了翁先生縣人也
故宅在縣西七里

邛水又東受牙江

邛水又東受斜江斜江源出鶴鳴山東西二溪出兩腋
間委曲斜繞東南受乾溪又東南爲官渡河又南入邛

鶴鳴山形如覆甕上有二十四洞應二十四氣七十二穴應七十二候每一氣候至則一洞穴開餘皆閉塞太清宮是其喙元真坊是其頂大坪是其背天柱山石柱巖是其兩翼冠子山是其尾也漢張道陵於此修仙按道陵不見於後漢書惟神仙傳諸書有之道陵沛人畱侯八世孫年五十修道隱廣信之龍虎山又二十餘年入蜀住鶴鳴山著道書二十四篇以漢桓帝永壽二年九月九日與其妻雍氏一云孫氏弟子趙昇王萇於閬中之雲臺山上昇其子衡字靈

真以漢靈帝光和二年正月二十三日於彭州之陽
平山上昇衡女玉簫無夫而孕以三月六日卒腹踊
得本際經十卷葬溫江縣今女郎觀是也一云張魯
女自剖其腹得龍子一雙葬陝西城固縣之黃沙水
南玉蘭兄卽張魯字公祺爲益州司馬襲殺漢中太
守蘓固及別部司馬張修據其地自號師君以鬼道
教民來學者稱鬼卒信道者號祭酒垂三十年曹操
破降之封閬中侯其孫自蜀復還龍虎山世世居之
晉郝愔郝曇奉天師道皆其術也北魏寇謙之得其

術亦爲天師而梁武帝時有張天師道裕者唐天寶
六載詔其子孫嗣教宋祥符九年張隨賜號真靜先
生崇寧二年張繼先賜號虛靜先生元至元十三年
張宗演賜號冲和真人此其最顯者然虛靜係道陵
三十代孫隱義眉山平生不娶則今所嗣天師非嫡
脉也又三國志華陽志並云陵死子衡傳其業衡死
魯復行之未有言其昇仙者李膺益州記謂鶴鳴山
舊銘張道陵爲蝮蛇所吸門人以爲登仙甄鸞僧道
宣輩遂藉爲口實夫仙者鍊氣而成是以有金丹血

肉難駐是以有尸解得導引服食之術天元不損延年久視固有之矣若夫天本積氣豈有上清宮闕罡風旋轉瞬息萬輪又豈鍊氣之軀所能上下則昇天之說本不可信

邛水東經新津縣南爲南河又東經寶華山下入江華陽國志曰李冰通文井徑臨邛與蒙溪分水白木江會武陽天社山下入江

南廣江

南廣江源出貴州鎮雄州境內

亦名黑水亦名渚水亦名復寧溪漢書曰南廣汾關
山符黑水所出北至夔道入江又有大涉水北至符
入江過郡三行八百四十里水經注曰江水又東渚
水北流注之郡注曰符黑水出寧州南廣縣縣故健
爲之屬也漢武帝太初元年置延熙中分以爲郡導
源汾關山北流有大涉水注之水出南廣縣北流注
符黑水又北逕夔道入江謂之南廣口渚水則未聞
也元和志曰南廣口水天寶六年改皂水按南廣諸
蠻唐有訓騁浪三州有魯望蠻浪稽蠻羅哥谷蠻婆

秋蠻烏皮蠻離東蠻銅鉗蠻麼些蠻宋爲硯嗣有羈
縻十四州屬敘州曰建州照州獻州南州洛州盈州
德州爲州移州扶德州播浪州筠州武昌州志州
南廣江又西北經羅星渡

故鞏州治也元爲上下羅計長官地江至此始通州
楫凡滇銅自雲南大關陸運至此舟載下敘州

南廣江又北受宋江宋江源出烏蒙山箐北經梅嶺爲
梅嶺溪又東受七寶山之清冷溪又東北入南廣

梅嶺宋砦治也政和五年知梅嶺砦高公老以金玉

器飲州酋卜漏而漏心艷之因上元張燈襲破梅嶺
砦虜公老妻妻帝宗女也義不受辱而死詔贈節義
族姬發陝西軍三萬人以趙適領之通捕山獠束麻
灌油焚之獠奔焚賊舍乃斬卜漏拓二千里

南廣江又西受定川溪定川溪有二源一出貴州畢節
縣西核桃溪一出雲南鎮雄州北羊落溝東北經西河
口合流北受孔雀溪又北經筠連縣城西又東北經高
縣城西北入南廣江

筠連縣故焚道地也唐武德中置筠州領鹽水筠山

羅余臨居澄瀾臨岷唐川尋源八縣連州領當爲都
寧邏遊羅龍加平清坎六縣俱屬戎州羈縻武氏改
筠州爲定川州元許爲筠連州治騰川縣屬永寧宣
撫司尋廢騰川明洪武四年改州爲縣屬敘州府○
名勝記曰其地南通芒部西控烏蒙四山皆竹一色
相連故名筠連按筠連本二州之名名勝記合而釋
之非也

高縣故僰道地也唐武德置高州領珙巴移甫徙西
三縣播郎州領播勝從顏願化三縣屬戎州羈縻宋

熙寧後廢入長寧軍元至元十七年復置高州屬敘
州路 國朝改縣屬敘州府

南廣江又西北經石門山

山界高慶二縣之界卽古石門道也山中產蘭亦名
蘭山漢唐蒙鑿石門以通南中迄於建寧二千餘里
山道廣丈餘深三四尺鑿鑿之跡猶存隋開皇五年
益漢二州兵開石門鎮唐初置石門縣設石門柳疆
二鎮領五部落曰彌羌鑠羌胡叢東欽磨些宋改石
門砦領羈縻十二州曰協州功騎州靖州曲江州哥

陵州品州荊連州碾衛州瀉州從州播陵州鉗州

南廣江又西北經慶符縣城南

江之南岸有大石屹立相傳感魄叔通至孝而出謂
之孝子石然孝子石在瀘水入大江之口此附會也
江之北岸有大石屹立置鎖於江以據險岸石鐫鎖
江津三字

慶符縣故焚道地也唐初置曲州石門縣貞觀五年
分置鹽泉縣屬南通州八年分置撫夷縣省石門鹽
泉入之屬戎州天寶元年省撫夷入義賓移曲州治

開邊縣宋政和三年置祥州來附縣慶符縣屬敘州
路宣和二年省祥州來附入縣領柔遠樂從清平石
門懷遠五砦元領四十六屯曰落骨落牟落財落賢
落搔落梅落松落魂上落昧下落昧落島落燕落能
山落寡水落寡落炎落女落鷗得幸得享得了得晏
得具得淵得奸得婁得播得慮得會得惡上得辛下
得辛息收莫面騰斛許宿九色屯右日影賴扇許焰
騰朗周頭愛荅落愛荅速阿郎頭明廢屯屬敘州府
羈縻

南廣江又北經天倉灘

初南廣江有趙灘木灘最險明萬歷中九絲蠻叛副使李江司轉運遙從萬山中逆舟而上經二灘亂石縱橫水勢直下若建瓴長年循高巖牽引多死成都守陳大壯鳩工鑿之而梅雨暴漲督工巡檢曾本死於水曾省吾平蠻後始鑿平之

南廣江又北經荔枝灘

巖旁多產荔枝在縣北三十里

南廣江又西北經來復渡受黑溪

即古來附縣治在縣北五十里水至此折而東行

南廣江又東北經漢陽山

山在縣北八十里武侯南征駐軍處壁鏤武侯征蠻
故道六字有古漢王墓墓高大無意中往往見之尋
訪輒不得其處按漢書犍爲郡漢陽縣注曰犍爲都
尉治山有關谷漢水所出華陽國志曰朱提郡漢陽
縣有漢水入延江水經注曰漢水出犍爲道山關谷
東至營邑入延江名勝記曰度符漢置漢陽縣屬犍
爲郡蜀漢改屬朱提郡縣南七十里連天山漢水出

焉又西南有漢陽山以在漢水之陽也廢漢陽縣當
在此二山間然江安縣連天山綿水所出卽古綿水
縣且其水北入大江不南入延江也延江去此絕遠
卽此有漢水亦不相通名勝記非也古漢陽當在雲
南曲靖府界

南廣江又東北經宜賓縣東南入江

南廣入江處有洞潛於溪淵魚鼈藏匿之所江面巨
石橫灘故舟自羅星渡而下順流數百里至此棄舟
登陸九五里不得通舟也江口有天柱山巨石屹立

如柱下俯急流每春有魚自下躍上張網得之日可得數百頭旁建觀魚亭遊人坐亭觀魚以爲樂然指曰南廣水在敘州府城東十餘里出西南呂部蠻部自禾蛾夷國過慶符縣東北至南廣洞入江

清江

清江源出白巖山

清江又北受嘉魚泉嘉魚泉源出馬鞍山北入清

名勝記曰嘉魚泉去城一里馬鞍山之趾泉激石湧出小魚四時如一不增不長邦人釀酒必用山後湫

及嘉魚泉則味甘冽王章嘉魚泉記兵厨之酒冠於
東州矣上有臨流閣流杯池諸勝

清江又北經長寧縣城東爲東溪受硯石溪硯石溪源
出牛心山西入清

牛心山在軍治形嶺峯如牛心溪在山後巖石如盤
可以爲硯

長寧縣故樊道地也唐儀鳳二年開置長寧州領婆
負婆居青鹽羅門四縣久視元年置清州領新定清
川固城居牢四縣屬瀘州羈縻宋熙寧六年內附置

清井監及安夷寨七年置小溪口砦十年改小溪爲
武寧砦大觀四年廢安夷政和三年置清平砦四年
置長寧軍改武寧砦爲縣五年置石筍砦梅洞砦六
年復置安夷寨皇祐元年置三江砦三年改爲寧遠
砦宣和二年廢武寧爲堡四年改堡爲砦嘉定四年
改安夷寨爲安寧縣以武寧砦屬之元至元二十二
年省安寧入長寧軍隸馬湖路明洪武四年復置安
寧縣七年改長寧軍爲縣省安寧人之屬敘州府○
圖經曰長寧縣西徑馬湖南控烏蠻東介安溪北接

綿水趙招討平夷表曰左連阿水右連石門也

消江又北受西溪西溪源出越王山北經長寧縣城西
爲西溪又北受冷水溪冷水溪源出筆架山東入西溪
西溪又東經三江口入消

越王墓高廣各數丈花磚砌起有合抱古栢生其上
云唐太宗子越王貞爲綿州刺史卒葬此冷水溪宋
有耕者掘地得銅脾上鐫小桃園三字併有詩曰綽
約去朝真仙源萬木春要知竊桃客不是會稽人因
改名桃源溪會消合流謂之滙覽

清江又北經清井

井有二脈一鹹一淡皆可煎鹽塞其一則皆不流謂之雌雄井昔燕子瞻在清井監得夷人所製蠻弓衣上有織文乃梅聖俞春雪詩也子瞻以遺歐陽永叔永叔有寶慶三年雷會所斲古琴遂裁弓衣爲琴囊焉

清江又東經武寧舊砦爲武寧溪

上有巨石橫截中流宋嘉定間故相虞允文子杭孫爲守鑿之以通舟楫石上大鐫虞公峽三字

清江又北經梅嶺受琪溪琪溪源出琪縣南落浦洞北受魚孔溪又東北經琪縣城東北又東入清

琪縣故樊道地也宋齊以後沒於蠻隋開皇四年開置協州大業初廢唐儀鳳二年開置鞏州領陵樓都檀波婆比求播郎五縣薩州領黃池播陵二縣定州領支江扶德宋水三縣天授二年置思義州領多溪洛溪二縣俱屬瀘州羈縻先天二年降薩鞏爲羈縻州天寶初改鞏州爲因忠郡薩州爲黃池郡乾元復故宋熙寧間廢入長寧軍元至元十三年置上下羅

計司及定川所屬敘南宣撫司明玉珍潛據改琪州
明洪武四年改縣屬敘州府萬歷中分置都寧縣尋
省

消水又東北經安寧橋爲安寧溪

故安寧縣治也消江至此可通舟楫順流入江百貨
叢集爲長寧繁華之地

消江又東北受思晏江思晏江源出興文縣西南晏峯
下北受水車河又北受青岡溪青岡溪源出興文縣西
建武營之螺螄寨流經乾溪伏於洞中至青岡溪復出

入思晏思晏江又北入清

興文縣故樊道地也唐儀鳳二年開置晏州領思義
柯陰新賓扶來思晏喀剛羅陽七縣悅州領甘泉清
濱臨川悅水夷隣胡播六縣先天二年改屬戎州羈
縻天寶改晏州爲羅陽郡乾元復爲晏州改屬瀘州
羈縻宋熙寧廢入長寧軍政和中沒於大壩都掌蠻
元至元十七年置大壩都總管二十三年改戎州屬
馬湖路洪武四年改戎縣萬歷四年改興文縣屬敘
州府○縣屬都掌蠻卽樊獬苗獠之種所謂瀘夷也

諸峯盤亘大壩爲門戶其東爲凌霄城又東爲九絲城而都都寨峙其東南有山都水都水都平行無可竄匿獨山都狡惡爲敘南惠明成化三年總兵李瑾尙書程信討平之改大壩爲太平置長官司嘉靖末蠻酋阿大阿二方三等據九絲城稱王萬歷元年巡撫曾省吾平蠻寨六十餘所拓地四百里獲銅鼓九十三面乃改戎縣爲興文縣而各寨舊名咸更之九絲城曰平蠻城凌霄城曰琪極城印靶山曰文印山弔猴山曰降蠻山雞冠嶺曰金雞嶺內官寨曰武寧

山都都寨曰都定寨銅鼓者諸葛武侯製以鎮蠻其形上寬中束下敞奇文異狀互相錯蟠有雕刻螭鸞蝦蟆之形其有聲者六十四鼓擊之彭彭如鼓置之水中聲更宏蠻人以爲寶又有銅鬻二口大上小下狀若旣鑄無足兩耳峙如山形尤爲蠻中至寶亦曾省吾所獲者

清江又東受綿溪綿溪源出連天山北入清

連天山廻旋曲折高聳參天清綿二水之會卽東晉綿水縣故城綿入清清入江清自受綿之後亦通名

綿水

清水又北經江安縣城東南入江

綦江

綦江源出貴州桐梓縣北爲坡頭河又北受松坎河又北受三溪河

綦江亦名夔溪亦名夜郎溪亦名南江寰宇記曰夔溪自三溪縣西北經廢丹溪縣又北經南川縣東南四十步紀勝曰夔溪從夜郎境流經南平軍城下按寰宇記所謂南川縣卽南平軍非今南川縣也又按

夜郎卽李白放流處唐貞觀十六年開山洞置珍州
夜郎麗臯樂源三縣天寶改州爲夜郎郡屬黔中道
元和二年州廢屬濠州

綦江又北經趕水關爲三岔河

綦江又北受丹溪卅溪源出涅槃山東入綦

其色如丹亦名赤水亦名葛溪勝覽曰樊溪葛溪東
溪合流縣之西北故貞觀置三溪縣所理名爲石城
甚爲險峻寰宇記曰南平西四里赤水卽卅水唐置
丹溪縣於此丹溪合於樊溪故改南州爲樊州

綦江又北受東溪東溪源出琵琶山孝婦泉西入綦
勝覽曰南平軍西北有東溪溪上小市有孝感橋紹
興甲戌有里婦從姑過溪姑墜水婦救之亦墜漂至
灘下皆不溺

綦江又北受嶺溪嶺溪源出分嶺山西南受德威溪德
威溪源出寶山砦北經開邊堡又北入嶺嶺溪又北入
綦

綦江又北經綦江縣城東北受龍角溪

焚溪至此始有綦江之目水作蒼白色故也縣城故

基市地紀勝曰宋紹興二十六年移南川鎮稅務於
大基市

綦江縣故巴縣地也唐武德二年分置南州隆陽縣
丹溪縣三年改夔州四年復爲南州貞觀四年改南
平州又置瀛山縣十三年廢瀛山十七年廢丹溪又
於西南夷界開山洞置漆州扶歡縣樂來縣榮懿縣
先天二年改隆陽爲南川天寶初改南州爲南平郡
漆州爲漢溪郡乾元復故咸亨元年廢樂來宋初沒
於蠻爲羈縻州慶歷八年改屬渝州皇祐五年廢南

州爲南川縣熙寧七年廢溱州爲溱溪堡榮懿砦淳
祐五年置南平軍屬夔州路大觀二年復置溱州溱
溪縣及夜郎縣宣和二年廢三年徙軍治隆化廢南
川元置南平綦江長官司屬播州宣撫司明洪武初
改綦江縣屬重慶府

綦江又北受沙溪又北受清溪

綦江又西北經龍登山

有龍塘石蟹泉虎跳嶺諸勝相傳宋太祖潛時所登
然宋太祖何得至此謬也

綦江又西北受笋溪笋溪源出江津縣南綦盤山北經
續昌橋又北經牛渡又北經南江入綦
綦江又北經江津縣東入江

黔江

黔江源出貴州威寧州東北入仙海

黔江亦名延江亦名更始水亦名涪陵水水經注曰
涪陵水出縣東故巴郡之南鄙王莽更名巴亭魏武
分邑立爲涪陵郡張堪爲縣會公孫述擊堪同心義
士選習水者筏渡堪於小別江卽此也其水北至枳

縣入江又曰枳縣治涪陵水會庾仲雍所謂有別江
出武陵者也水乃延江之支津分北逕涪陵入江元
和志曰黔州西有巴江水一名涪陵江寰宇記曰涪
陵江北流入彭水縣一名內水九域志曰巴江又名
白沙水勝覽曰涪江自思州之上費溪發源經五十
八節名灘方至黔州既與施州江會流九十里經彭
水武隆二縣凡五百餘里與蜀江會涪州東以其出
自黔州故爲黔江其水澄澈可鑒毛髮底見苔石魚
蝦可數

黔江又東經七星關受黑章水

黔江又東受落折河又東經大定府城南

黔江又東受以則河又東受烏西河又東北爲六歸河
又東受簸朶河又東受西溪河

黔江又東經黔西川東南受猓獠河又南受高家河

黔江又東南受

楊柳河

源出卜牛水東受猪腸水又東

北經平遠州城北又東北入黔

黔江又東南受以麥水又東受

三岔河

源出威寧州東

南以且海海周二十里水東北流折而東南受水城河

又折而東受以固河又東爲簸渡河又東南經西堡又
東南經安順府西北之定南汛受古北河又東受三水
爲三分河又東北經安平縣西北又東北經清鎮縣西
北又折而西北受牛場河又北入黔

黔江又北而東受鴨池水又東而南受鎮西衛之跳蹬
河

黔江又東北經脩文縣西北受雞公河雞公河源出廣
順州西境水東南流東經州城南又北經象鼻關又北
經廣興鎮爲麻線河又北經安平縣城南受車頭河又

東受洛陽河又東北經清鎮縣城西爲谷隴河又北受那奢河又西北入黔

黔江又東北經青山司北陸廣驛爲陸廣河

黔江又北經黃沙渡又東北經烏江關南受息蒙水

黔江又北受迤濟河迤濟河源出黔西州西北南流經城西折而東南受打鼓寨之水又東北受渭河爲迤壩河又東北受烏慶河又東北受沙溪又東入黔

黔江又東北經鎮南關

黔江又東受清江清江源出廣順州白雲山爲四方河

東北經中曹司又東受老鴉關水又東經貴陽府城西
爲南明河又東北受龍洞河又東北爲牛渡河又東北
經虎墜司又東北爲干壩河又東北受甕首河甕首河
源出龍里東谷者巖爲加牙河東流受西堡水又東南
受龍頭水又東受甕城河甕城河源出貴定縣西天目
峯爲谷壤水東北受太平水又北爲紫江又北入甕首
甕首河又西北入清清江又北受洗泥河又北經開州
東又東北入黔

黔江又東北爲烏江

蜀水經

卷之六

三

黔江又東南受湘江湘江源出龍巖山南經迤義縣城
東北又東南受桃溪又東受洪江洪江源出婁山東南
合仁江入湘湘江又東南受鹿塘河鹿塘河源出綏陽
金竹山又南入湘湘江又東南入黔

黔江又東南受湄水湄水源出金條山南經湄潭縣城
北又南入黔

黔江又東南受甕安河甕安河源出高坪司之乾溪又
北經甕安縣城西北又北受坪橋水又北受老鷹洞之
水又北受太和洞之水又北入黔

黔江又東南受白泥江白泥江源出翠蘿山東北受牛場河又東北爲餘河又東北經石阡府西受巖頭河又東北受白巖河又東北受義陽江義陽江源出穿簾谷南受清江溪又東經龍泉縣城北又東爲桶口河入黔

黔江又東北經思南府城東爲水德江

黔江又東經思印縣西受朗溪又北受猛溪又北受麻海溪又受印江

黔江又北經沿河司受由江

黔江又北受三岔水三岔水有三源一爲銅鼓潭一爲

宜居河一爲石板溪俱西南折而西北由兩河口入黔
晏斯盛黔中水道考曰烏江卽夜郎水出修文縣西
北之陸廣河其上自威寧州之八仙海營菩薩沱露
州各溪澗流出過畢節縣西南七星山下爲七星水
有關曰七星關有橋曰七星橋橋西南有黑章水注
之或曰卽墨特川元大德五年劉國傑破蛇節宋隆
濟於墨特川倘此地耶又東流至大定府西南有落
折河自高城西北二十里當兩山間破地吼去南流
來注之又東過高治南東流右得以則河又東左得

烏西河又東爲六歸河又東右有簌朶河合武着墮
極織金等河水自平遠州界黑跨牛場汛東流來注
之又東北有西溪河合楠木河水東南流來注之又
東至黔西州東南爲鴨池河有渡曰鴨池渡西岸如
劈崇巖如雪黔西大定要津又東至修文縣西北是
爲陸廣河有水自安平縣東南界東北流爲洛陽河
又東北至清鎮縣城西爲滴澄河又北與安順府東
南之九溪河北界之三岔河谷龍河下流合而東北
流來注之又有三潮水自修文縣北流來注之又東

左合白花箐水又東左合沙溪水有渡曰黃沙渡又東有羅傳大河自永寧縣東南過遵義府西南流來注之又東過修文縣養龍司北是爲烏江有渡曰烏江渡關曰烏江關又東得刀靶水又東得養馬水又東至開州東北遵義府綏陽縣西南有渡曰茶山渡有水自桐梓縣西南正安州西至石子坡南過遵義府西南入湘水右合綏陽縣北之源溪水朗水傘水厚水南流來注之又有三江水自湄潭縣北合窄溪渡上關花水溪湄溪大洞溪馬渡溪角路溪大溪諸

水從廢容山司至望浦合流北來注之又南有渡曰落汪渡右合渡口水又南有洗泥河水注之東南至巖門有南明河水來注之南明河出貴陽府廣順州東北阿沙壩龍潭合濟番河會一宿河尤愛溪上馬橋河四方河過中曹司至府城西南左受黔靈山諸泉水及擇溪貫城河水東過府城南右得富水又東南得龍洞河黃泥哨牛渡河諸水由廂子口喇平司迤北至巴香合平伐三岔河八字河所匯貴定縣城西之甕城河再過平越府西界之清水河一曰皮隴

江者東北經開州東南由天星橋入弔口綿花渡而東北會於巖門在開州東甕安餘慶二縣西北有渡曰巖門渡又東至龍泉縣西南有渡曰葛閃渡又東南有甕水高坪水袁家渡水白巖河水滙爲江界河合餘慶縣之白泥司水佛山河水北流來注之又東至桶口有水自餘慶縣東南界北流爲滿溪合石阡府之龍底河凱科江洋溪沱溪樂回溪等水東北流注之又東爲三江口又東北流有水自龍泉縣東南流來注之又東流過思南府城南是爲德江有渡曰

德江渡又東有白鷺洲又東得鸚鵡溪水又有思邈水從印江縣西北之朗溪流來注之又東過婺川縣東左有豐樂河得煎茶溪水登龍河水合洪渡河倒羊溪水東流注之又東過婺川縣東北界而達涪州爲涪水通於蜀入於江

黔江又北經酉陽州南受蓬江蓬江源出咸豐縣金崗山又西南合南河馬河之水又西南合大田水又南合馬山水又西南爲東小溪又南受梅溪又西南經石牙關又西南受七十八溪七十八溪源出柵山東經梅子

開又東經黔江縣城西受八面山之大木溪又東南經石城故縣又南經魚灘入蓬蓬江又南受金山巖之水又南受南溪南溪源出湖北施南府南忠洞西受白龍潭水又東南受東峒水又西南受以弔河爛河又西南經來鳳縣境受大旺水又西入蓬蓬江又西南經龔灘入黔

蓬江亦名阿蓬水亦名太平水○七十八溪一名四十九溪溪水折流四十九灣夾於兩岸春月百花飄落隨水可愛黃魯直竹枝歌日落四十九渡明是也

俗以此水爲黔江然黔江卽涪陵水黔中黔州俱以涪陵水得名唐時水經境內故名縣爲黔江後世界畫出入水不經境則求所謂黔江者而不可得遂以縣城河當之爾按縣以黔江名而無黔水又古彭水卽今之開江則彭水亦無彭此猶綿州之無綿水瀘州之無瀘水漢州之無漢水墊江之無墊水眉州之無眉山銅梁之無銅梁山巴州之無巴城也寰宇記彭鼓聲也峽水澎湃其聲似之

酉陽州故酉陽縣也漢置屬武陵郡晉沒於蠻貞觀

九年分大鄉置三亭縣天授二年析辰州置溪州郡
治大鄉縣唐末西陽蠻叛駙馬冉人才征之畱守其
地遂世有之宋改蠻寨爲西陽縣置平茶洞長官司
元改西陽州屬懷德府領溶江芝子平茶佛鄉等處
長官司石耶洞軍民府明洪武五年蠻冉如彪歸附
置州尋改宣慰司如彪爲使八年改宣撫司屬重慶
衛領平茶邑梅麻兔石耶四洞長官司 國朝順治
十五年冉奇鎮歸誠置宣慰司雍正十二年改黔彭
廳十三年改西陽州乾隆元年置秀山縣直隸州東

道○路史謂黔之彭水今酉陽也有酉水按酉水在
州西北入湖廣界與彭水無涉

龔灘故洪杜縣治與貴州安化縣之沿河祐溪土司
交界洪杜縣初治洪杜山唐貞觀三年北移洪杜溪
麟德二年移龔湍

黔江故涪陵地也漢建安六年分置丹興縣屬巴郡
都尉蜀漢改屬涪陵郡晉廢於蠻隋開皇五年置庸
州石城縣大業二年州廢以縣屬巴東郡唐武德元
年改屬黔州天寶元年改石城爲黔江米領白石石

門佐水永安安樂雙洪射營右水蠻冢浴水潛平鹿
角萬就六保白水土溪小溪石柱高望木孔東流李
昌僕射相陽小村石門蕪田木柵虎眼二十九砦明
洪武五年省入彭水十一年置黔江千戶所十二年
復置縣屬重慶府 國朝雍正十二年改屬黔彭廳
十三年改屬酉陽州

黔江又西北受洪渡河洪渡河源出婺川縣境內東經
綏陽場爲綏陽河又東北受大水小水二河又東北受
簡家溪又東北受豐樂水又東北受龍登河又東北經

婺川縣城東南爲婺川又東北入黔

黔江又西北受郁江郁江源出黔江縣西武陵山爲可
通水西受泡水泡水源出金山蓋南入郁江又西受
西小溪西小溪源出金鷄箐南經亭子關合後溪入郁
郁江又西經郁山鎮又西受木洞水木洞水源出湖北
利川縣忠路土司南會龍觜河又西南受胡家塘水又
東受沙溪又南受活龍坪水又南經北巖關爲中清河
又西南入木洞木洞水又西南入郁江又西南受清
水溪又西南受新洞溪又西南受鹿渡溪又西南經麻

油灘又西南經黔江縣城北又西入黔

郁水發源楚之唐巖經郁山鎮而繞城之右與黔水
匯清水溪自石洞流出一名狗泉麻油灘上懸巖千
仞攀緣不到其巖竇嵌空有三木櫃未知始自何年
不折不腐謂之萬年倉亦稱櫃子巖陶文彬祀飛井
記曰郁山鎮沂流至伏牛山前分爲二道其一上達
鷄鳴鵲鴿二井舟行至龍灘沱而止其一稍北而繞
山之右自唐巖經郁井而來其源甚遠

黔江又北經彭水縣城西北

彭水縣古彭國也漢置涪陵縣屬巴郡王莽改巴亭縣東漢復故建安六年劉璋置屬國都尉又分置漢葭縣縣民謝本求以丹興漢葭爲郡璋改置涪陵郡改漢葭爲漢復晉永嘉以後沒於蠻周保定四年蠻帥田思鶴內附置奉州建德三年改黔州隋開皇十三年置彭水縣大業三年改州爲黔安郡十一年分置信安縣唐武德元年復爲黔州二年分置盈隆縣洪杜縣又改信安爲信寧屬義州貞觀十一年義州廢以信寧改屬黔州二十年分盈隆置都濡縣先天

二年改盈隆爲盈川天寶元年改盈川爲洋水改黔
州爲黔中郡乾元復爲黔州屬江南道大順元年置
武泰軍天復三年罷軍宋爲黔州黔中郡太平興國
五年復爲武泰軍屬夔州路嘉祐八年洪杜洋水信
寧都濡俱省入彭水領洪杜小洞界山難溪四砦領
羈縻州四十九南寧州遠州健州清州蔣州知州蠻
州襲州義州刊州鶴州勞州宜州福州儒州令州郝
州普州寧州緣州那州鸞州絲州邛州敷州晃州俟
州樊州添州瑤州雙城州訓州鄉州茂州龍州整州

樂善州撫水州思元州逸州思州南平州勳州姜州
稜州鴻州和武州暉州亳州鼓州懸州南渡後增七
州爲五十六紹定元年改紹慶府明洪武罷府以縣
屬涪州 國朝改屬重慶府雍正十二年改屬黔彭
廳十三年改屬酉陽州○城南一里綠陰軒平曠可
容十數人山谷書綠陰軒三字於石相近有卧佛巖
石欹懸生一竅甚圓仰窺之又生一竅其中虛明有
橫石眉目宛然如人之曲肱枕卧也唐權載之黔州
刺史廳記曰黔中爲楚西南徼道在漢爲武陵莊蹻

循江以畧地唐蒙浮船以制越舊圖經曰地近荆楚
侯如巴蜀五蠻雜東蠻蠻聚落陰而多晦草木少洲
碑目曰山有唐人刻石云巴黔路途濶遠亦無館舍
凡至宿泊多倚溪崑就水造食鑽木出火按元和志
秦漢黔中是今辰錦敘樊澧郎等州今黔中是夷賈
思播等州隔越峻嶺嶺東有沅江東注洞庭湖嶺西
有涪陵江自牂牁北歷播賈思黔北注岷江是秦漢
而上此水無黔名也又按元和志都濡縣西北六十
里有都濡水泮水縣西三十里有泮水寰宇記都濡

縣西南一百里有波濤水流入丹陽丹陽水源出丹陽山東入涪江洋水縣南一百里有羅奈水南七十里
有都江水皆在彭水縣境內今邑乘無能考其源流者考元和志都濡縣在黔州南二百里洋水縣在黔州東一百六十里洪杜縣在黔州南一百三十里
信寧縣在黔州西北一百三十里遠近方向瞭如指掌若按里尋方而索之古跡無不可見而惜乎邑乘之疎漏也

黔江又北經石蛇灘

自酉陽司鹿角鎮入縣界一百里至縣城又二十里
至木梭灘又三十里至上新灘又十里至鹿角灘又
十里至石蛇灘水勢甚險舟行至此必盡出所載然
後可行又十里有曲尺下巖下新替蛇土腦五灘水
勢畧平過此至江口鎮入舊武陵縣界始爲安流
黔江又北受木棕水木棕水源出麻王洞爲射香溪南
經木棕灘受印溪又南入黔

黔江又北經江口鎮受渡頭河渡頭河源出貴州綏陽
縣西北婁山東經桑木關又東北受官渡水又東北受

米良水又東受牛渡水又北受清溪又東北經正安州城東南又東北受橋溪又東北經三江口受安泗溪羊心溪黃泥河之水又北而東受大花溪又西北入黔黔江又折而西流經關頭灘

益州記曰江水自萬寧縣西北二百八十里下關頭灘灘長百步懸巖倒水舟楫莫施志曰關灘兩下排列中多巨石飛湍激怒聲震如雷觀察陳邦器題澎湃飛雷四字於石上器物譜曰東關灘叢石中南響石舊傳有僧過此談經而鼓之其聲鏗鏗然僧安能

響石石自響耳禹貢有泗濱浮磬

黔江又西北經武隆縣故城西

寰宇記曰內江一名涪陵江一名巴江在縣南屈曲北流又曰江灘在縣前巴江水中

黔江又北經白馬鎮受石梁河

江邊半巖有白石如馬江中有石如鞍

黔江又北受白水白水源出方竹山谷爲湖陽溪北經雀屎巖又北經南川縣城東受半溪半溪源出九邊山西北入白白水又北經水東橋受四十八渡水四十八

渡水源出馬觜山西經玉石臺又西受金流水又西南入白白水又東北受石牛水又東北受平壩河又東北經楊柳壩爲大溪河又東北入黔

紀勝曰湖陽溪源出天衆山其色如練自夷界龍泉鄉流出又曰九遞山高廣不知幾里絕壁如銀人視其昏明以候晴雨上有洞瀦水高廣百尺左右石臺有兩泉溫冷不常池上各蟠石龍初非鐫刻可至按四十八渡水一溪曲折津渡縈迴計硤揭回十有八處也玉石臺兩山壁立有穴如戶牖行平徑數百步

南川縣故巴地也甯氏世爲南平渠帥陳末以帥爲
寧越太守陳亡遂不入朝唐武德二年開南廣以寧
越鬱林之地來降置南州隆陽扶化龍巫丹溪靈水
五縣三年改州爲焚州四年復故貞觀五年置三溪
縣七年置當山嵐山歸德汶溪四縣八年省十一年
省隆巫扶化靈水先天元年改隆陽爲南川二年改
隆化爲賓化宋復爲隆化治平中李光吉梁秀等三
族據其地熙寧三年平三族置隆化縣榮懿扶歡二
砦隸涪州八年平銅佛壩建南平軍省南川縣入隆

化元豐元年復置南川嘉熙三年徙軍來治省三溪
入之領榮夷開邊通安安穩歸正五砦元至元十一
年省軍改南川縣屬重慶路

黔江又東逕涪州城東銅柱灘入江

寰宇記曰昔人維舟見水底有銅柱相傳漢伏波將
軍馬援所鑄按後漢書馬援討武陵五溪蠻軍次下
雋有兩道可入從壺頭則路近而水險從充則途夷
而運遠耿舒欲徑充道援以爲棄日費糧不如進壺
頭搃其咽喉充賊自破遂進營壺頭會暑甚援中病

而卒是援之征蠻由武陵不由涪陵且病卒無功可紀也馬援銅柱實在廣東鬱水入海處俞益期牋曰馬文淵立兩桐柱於林邑岸北有遺兵十餘家不反居壽冷岸而南對銅柱悉姓馬自相婚姻交州以其流寓號曰馬流山川移易銅柱尙在海中正賴此民以識故處林邑記曰建武十九年馬援樹兩銅柱於象林南界與西屠國分漢南疆土人以之流寓號爲馬流水經注曰馬文淵積石爲塘達於象浦建金標爲南極之界唐書環王傳曰本林邑地海行二千里

至其國南有大浦馬援所立銅柱在焉據諸家之說
是皆在今交廣間也唐元和中馬總爲安南都護建
二銅柱於故處刻著唐德兼以表伏波之裔然則交
趾又有馬總之銅柱矣又雲南廣西皆有銅柱唐南
蠻傳曰明皇詔何履光定南詔取安寧城及鹽井復
立馬援銅柱七修類稿曰大理府鐵柱每歲民帖金
以邀福故似銅此蒙氏所立咳餘叢考曰今廣西太
平府鎮南關外有銅柱五代史曰天福間馬希範攻
溪州蠻自謂伏波之後立銅柱爲表○提綱曰此水

自西而東而北源流二千三百里會貴州大定貴陽
遵義平越石阡思南六府及湖廣施南半府四川酉
陽黔江彭水南川涪州諸水實巨川也

漢書曰不狼山營水所出東入沅過郡二行七百三
十里流水自且蘭東南至益陽入江過郡二行二千
五百三十里溫水自鐔封東至廣鬱入鬱過郡二行
五百六十里水經曰延江水出犍爲南廣縣東至牂
牁營縣又東屈北流至巴郡涪陵縣注更始水又東
南至武陵酉陽縣入於酉水酉水東南至沅陵縣入

於沅鴈注曰涪陵水乃延江之支流延江水出犍爲
南廣縣東至犍犛縣縣有犛水出邑西不狼山東
與溫水合溫水一曰煖水出犍爲符縣而南入黠水
黠水亦出符縣南與溫水會俱南入犛水犛水於其
縣而東注延江水延江水又與漢水合水出犍爲道
關谷王莽之所通也東至犛邑入延江水延江水北
入涪陵水愚按延江犛水世無以今水相證者試考
其原委延江卽烏江犛水卽陸廣江漢水卽水德江
涪陵水卽郁江也南廣郡縣在貴州大定府境內而

永寧爲東郡故南廣有猶溪赤水盤蛇七曲之謠今
赤水猶在永寧境內水經謂其源出平夷郡營縣也
平夷郡廣輿記謂在雲南曲靖府南百二十里之陸
涼州然曲靖府北與貴州大定府之威寧相接在永
寧縣西南而永寧之東則遵義也華陽國志謂牂牁
郡治營縣郡有延江晉元帝分營縣半爲平夷郡而
營屬平夷營縣卽古營靈之國爲今貴州遵義府而
牂牁故城在思南府城之西獨漢陽不知所在但漢
時舊屬犍爲改屬朱提亦當在貴州境內與四川之

慶符無涉又水經謂延江合酉水入沅今酉陽州舊
水源出州北龍池鋪犀牛潭伏流二十里南至泉孔
而出環繞州城南至何家壩洞口又伏流五十里至
州東蒲海場過梅樹龍潭入辰州大河與延江大山
間隔本無貫注之理殆由山川通塞古今異宜亦猶
夷水出江沔水入渭不得以今疑古也夫城郭雖遷
山川不改稱名或異源流難誣考山川以定州郡禹
貢所以爲不刊之書也

長年云龔灘小元灘大元灘王家沱共九十里長灘

佛灘九拔九坎鹿角沱元灘共九十里穀雨子涼海
替灘聳洞宜茅腦彭水縣共九十里下塘口門指峽
長灘高關下巖木棕灘龍溪新灘鹿角子寒山峽江
口共九十里土泥關灘石牀溝羊角磧共四十里白
馬灘葛坊大溪河共四十里陳家嘴官碛三門子
小溪白巖口吳王溪涪州共四十里